



BOSNA I HERCEGOVINA

IZVJEŠTAJ O OBAVLJENOJ FINANSIJSKOJ REVIZIJI

*SUDA
BOSNE I HERCEGOVINE
ZA 2018. GODINU*



URED ZA REVIZIJU INSTITUCIJA BiH
КАНЦЕЛАРИЈА ЗА РЕВИЗИЈУ ИНСТИТУЦИЈА БИХ
AUDIT OFFICE OF THE INSTITUTIONS OF BOSNIA AND HERZEGOVINA

www.revizija.gov.ba

IZVJEŠTAJ
O OBAVLJENOJ FINANSIJSKOJ REVIZIJI
SUDA BOSNE I HERCEGOVINE
ZA 2018. GODINU

Broj: 04-16-1-823/19

Sarajevo, juli 2019. godine

Sadržaj

I	MIŠLJENJE NEZAVISNOG REVIZORA.....	5
	MIŠLJENJE O FINANSIJSKIM IZVJEŠTAJIMA	5
	MIŠLJENJE O USKLAĐENOSTI	7
II	IZVJEŠTAJ O REVIZIJI	9
1.	KRITERIJI	9
2.	REALIZACIJA RANIJIH PREPORUKA	9
3.	SISTEM INTERNIH KONTROLA	10
3.1	Finansijsko upravljanje i kontrola	11
3.2	Interna revizija	11
4.	BUDŽET	12
5.	FINANSIJSKI IZVJEŠTAJI	12
5.1	Pregled rashoda i izdataka iz budžeta	13
5.1.1	<i>Bruto plaće</i>	13
5.1.2	<i>Naknade troškova zaposlenih</i>	14
5.1.3	<i>Ugovorene usluge</i>	14
5.1.4	<i>Kapitalni izdaci</i>	14
5.2	Pregled prihoda i primitaka	15
5.3	Bilans stanja	16
5.4	Pregled dinamike zapošljavanja	16
6.	JAVNE NABAVKE	17
7.	OSTALO	18
7.1	Sudski sporovi	18
8.	KOMENTARI	19
	PRILOZI	19

I MIŠLJENJE NEZAVISNOG REVIZORA

Mišljenje nezavisnog revizora se daje na osnovu provedene finansijske revizije koja obuhvaća reviziju finansijskih izvještaja i, u vezi s istom, reviziju usklađenosti aktivnosti, finansijskih transakcija i informacija s relevantnim zakonima i drugim propisima.

MIŠLJENJE O FINANSIJSKIM IZVJEŠTAJIMA

Mišljenje

Izvršili smo reviziju finansijskih izvještaja **Suda Bosne i Hercegovine (u daljem tekstu: Sud)** koji obuhvaćaju: bilans stanja na 31.12.2018. godine, pregled prihoda, primitaka i finansiranja po ekonomskim kategorijama, pregled rashoda i izdataka iz budžeta, po ekonomskim kategorijama, posebne podatke o plaćama i broju zaposlenih, pregled dinamike zapošljavanja, pregled stalnih sredstava u obliku stvari i prava, pregled kapitalnih ulaganja, pregled doznaka iz tekuće rezerve budžeta, za godinu koja završava na taj dan i analizu izvršenja budžeta – tekstualni dio, uključujući i rezime značajnih računovodstvenih politika.

Prema našem mišljenju, finansijski izvještaji **Suda** prikazuju istinito i fer, u svim materijalnim aspektima, finansijsko stanje imovine, obaveza i izvora sredstava na 31.12.2018. godine i izvršenje budžeta za godinu koja se završava na navedeni datum, u skladu s prihvaćenim okvirom finansijskog izvještavanja.

Osnova za mišljenje

Reviziju smo obavili u skladu sa Zakonom o reviziji institucija Bosne i Hercegovine i Međunarodnim standardima vrhovnih revizionih institucija (ISSAI). Naše odgovornosti prema tim standardima su detaljnije opisane u odjeljku *Odgovornosti revizora za reviziju finansijskih izvještaja*.

Nezavisni smo od **Suda** u skladu s etičkim zahtjevima koji su relevantni za našu reviziju i ispunili smo ostale etičke odgovornosti u skladu s tim zahtjevima.

Vjerujemo da su revizioni dokazi koje smo pribavili dovoljni i odgovarajući da osiguraju osnovu za naše mišljenje.

Odgovornosti rukovodstva za finansijske izvještaje

Rukovodstvo **Suda** je odgovorno za izradu i fer prezentaciju finansijskih izvještaja u skladu s prihvaćenim okvirom finansijskog izvještavanja na nivou institucija Bosne i Hercegovine tj. Zakonom o finansiranju institucija BiH, Pravilnikom o finansijskom izvještavanju institucija BiH i Pravilnikom o računovodstvu s računovodstvenim politikama i procedurama za korisnike budžeta institucija BiH. Ova odgovornost podrazumijeva i kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja koji ne sadrže materijalno značajne pogrešne iskaze uslijed prijevare ili greške, odgovarajuća objelodanjivanja relevantnih informacija u napomenama uz finansijske izvještaje, kao i odabir i primjenu odgovarajućih računovodstvenih politika i računovodstvenih procjena, koje su razumne u datim okolnostima.

Odgovornosti revizora za reviziju finansijskih izvještaja

Naši ciljevi su steći razumno uvjerenje o tome jesu li finansijski izvještaji kao cjelina sačinjeni bez značajnog pogrešnog prikazivanja uslijed prijevare ili greške i izdati izvještaj nezavisnog revizora koji uključuje naše mišljenje. Razumno uvjerenje je visok nivo uvjerenja, ali nije garancija da će revizija obavljena u skladu s Međunarodnim standardima vrhovnih revizionih institucija uvijek otkriti značajno pogrešno prikazivanje kada ono postoji. Pogrešni prikazi mogu nastati uslijed prijevare ili greške i smatraju se značajnim ako se razumno može očekivati da, pojedinačno ili zbirno, utiču na ekonomske odluke korisnika donesene na osnovu tih finansijskih izvještaja.

Kao sastavni dio revizije, u skladu s Međunarodnim standardima vrhovnih revizionih institucija, stvaramo profesionalne procjene i održavamo profesionalni skepticizam tokom revizije. Mi također:

- Prepoznamo i procjenjujemo rizike značajnog pogrešnog prikazivanja finansijskih izvještaja, zbog prijevare ili greške, oblikujemo i obavljamo revizione postupke kao reakciju na te rizike i pribavljamo revizione dokaze koji su dovoljni i primjereni da osiguraju osnovu za naše mišljenje. Rizik neotkrivanja značajnog pogrešnog prikazivanja nastalog uslijed prijevare je veći od rizika nastalog uslijed greške, jer prijevare može uključiti tajne sporazume, krivotvorenje, namjerno izostavljanje, pogrešno prikazivanje ili zaobilaženje internih kontrola.
- Stičemo razumijevanje internih kontrola relevantnih za reviziju kako bismo oblikovali revizione postupke koji su primjereni u datim okolnostima, ali ne i za svrhu izražavanja mišljenja o uspješnosti internih kontrola.
- Ocjenjujemo primjerenost korištenih računovodstvenih politika i razumnost računovodstvenih procjena i povezanih objava koje je stvorilo rukovodstvo.
- Ocjenjujemo cjelokupnu prezentaciju, strukturu i sadržaj finansijskih izvještaja, uključujući i objave, kao i odražavaju li finansijski izvještaji transakcije i događaje na kojima su temeljeni na način kojim se postiže fer prezentacija.

S rukovodstvom komuniciramo u vezi s, između ostalih pitanja, planiranim djelokrugom i vremenskim rasporedom revizije i važnim nalazima revizije, uključujući i one koji se odnose na značajne nedostatke u internim kontrolama koji su otkriveni tokom naše revizije.

MIŠLJENJE O USKLAĐENOSTI

Mišljenje

U vezi s revizijom finansijskih izvještaja **Suda** za 2018. godinu, izvršili smo i reviziju usklađenosti aktivnosti, finansijskih transakcija i informacija s relevantnim zakonima i drugim propisima.

Prema našem mišljenju, aktivnosti, finansijske transakcije i informacije **Suda** za 2018. godinu u skladu su, u svim materijalnim aspektima, sa zakonima i drugim propisima koji su definisani kao kriteriji za datu reviziju.

Osnova za mišljenje

Reviziju usklađenosti smo izvršili u skladu sa Zakonom o reviziji institucija Bosne i Hercegovine i ISSAI 4000 - Standard za reviziju usklađenosti. Naše odgovornosti prema tim standardima su detaljnije opisane u odjeljku *Odgovornosti revizora za reviziju usklađenosti*.

Nezavisni smo od **Suda** u skladu s etičkim zahtjevima koji su relevantni za našu reviziju i ispunili smo ostale etičke odgovornosti u skladu s tim zahtjevima.

Vjerujemo da su revizioni dokazi koje smo pribavili dovoljni i odgovarajući da osiguraju osnovu za naše mišljenje.

Skretanje pažnje

Ne izražavajući rezervu na mišljenje o usklađenosti, skrećemo pažnju na sljedeće:

- *funkcija interne revizije u Sudu još uvijek nije uspostavljena (tačka 3.2 Izvještaja).*

Odgovornosti rukovodstva za usklađenost

Pored odgovornosti za pripremu i fer prezentaciju finansijskih izvještaja, rukovodstvo **Suda** je također odgovorno osigurati da su aktivnosti, finansijske transakcije i informacije u skladu s propisima kojima su regulisane i potvrđuje da je tokom fiskalne godine osiguralo namjensko, svrhovito i zakonito korištenje raspoloživih sredstava za ostvarivanje utvrđenih ciljeva, te ekonomično, efikasno i efektivno funkcionisanje sistema finansijskog upravljanja i kontrole.

Odgovornosti revizora za reviziju usklađenosti

Pored odgovornosti da izrazimo mišljenje o finansijskim izvješćima, naša odgovornost podrazumijeva i izražavanje mišljenja o tome jesu li aktivnosti, finansijske transakcije i informacije u svim materijalnim aspektima, u skladu sa zakonima i drugim propisima kojima su regulisane. Odgovornost revizora uključuje obavljanje procedura, kako bi pribavili revizione dokaze o tome koriste li se sredstva za odgovarajuće namjene i je li poslovanje **Suda**, prema definisanim kriterijima, usklađeno s relevantnim zakonima i drugim propisima. Procedure podrazumijevaju procjenu rizika od značajnih neusklađenosti sa zakonima i propisima koji regulišu poslovanje subjekta revizije. Također, naša odgovornost podrazumijeva i ocjenu finansijskog upravljanja, funkcije interne revizije i sistema internih kontrola.

Sarajevo, 15.07.2019. godine

**GENERALNI
REVIZOR**

Dragan Vrankić, v.r.

**ZAMJENIK
GENERALNOG REVIZORA**

Jasmin Pilica, v.r.

**ZAMJENIK
GENERALNOG REVIZORA**

Ranko Krsman, v.r.

II IZVJEŠTAJ O REVIZIJI

1. KRITERIJI

Ured za reviziju institucija Bosne i Hercegovine izvršio je reviziju finansijskih izvještaja i, u vezi s istom, reviziju usklađenosti. Revizija finansijskih izvještaja i revizija usklađenosti podrazumijeva proces objektivnog prikupljanja i procjenjivanja dokaza, kako bi se utvrdilo jesu li predmeti revizije, tj. finansijski izvještaji, kao i aktivnosti, finansijske transakcije i informacije, usklađeni s odgovarajućim kriterijima koji su sadržani u zakonima i drugim propisima. Kriteriji predstavljaju uporedne parametre koji se koriste kako bi se dala ocjena predmeta revizije.

Za ocjenu usklađenosti sa zakonima i drugim propisima korišteni su sljedeći kriteriji:

- Zakon o budžetu institucija BiH i međunarodnih obaveza BiH za 2018. godinu
- Zakon o plaćama i naknadama u institucijama BiH i podzakonski akti
- Zakon o porezu na dohodak i Zakon o doprinosima (FBiH i RS)
- Zakon o javnim nabavkama i podzakonski akti
- Zakon o državnoj službi u institucijama BiH i podzakonski akti
- Zakon o radu u institucijama BiH i podzakonski akti
- Zakon o upravi i podzakonski akti
- Zakon o finansiranju institucija BiH.

2. REALIZACIJA RANIJIH PREPORUKA

Ured za reviziju institucija BiH izvršio je finansijsku reviziju Suda za 2017. godinu, sačinio Izvještaj o finansijskoj reviziji i dao pozitivno mišljenje o finansijskim izvještajima sa skretanjem pažnje na slabosti sistema internih kontrola naplate prihoda po osnovu sudskih taksi, novčanih kazni, troškova krivičnog postupka i oduzimanja imovinske koristi pribavljene krivičnim djelom, kao i potencijalnih obaveza po osnovu sudskih sporova i pozitivno mišljenje o usklađenosti sa skretanjem pažnje na neriješeno pitanje interne revizije. U Izvještaju su date preporuke u cilju otklanjanja uočenih nepravilnosti. Sud je postupio u skladu s članom 16. tačka 3. Zakona o reviziji institucija BiH i izvijestio nas o preduzetim aktivnostima na realizaciji datih preporuka u cilju nadilaženja nepravilnosti identifikovanih u izvještaju o obavljenoj reviziji za 2017. godinu.

Uvidom u preduzete aktivnosti, dajemo osvrt na realizaciju preporuka:

Ocjena realizacije preporuka	Realizovana	Realizacija u toku	Nerealizovana
Sud na transparentan način prikazuje razloge izmjene pravilnika o unutrašnjoj organizaciji.	●		
U toku su aktivnosti na sačinjavanju registra rizika.		●	
Sud je preduzimao aktivnosti u cilju odgovarajućeg rješavanja pitanja uspostave funkcije interne revizije u Sudu, ali do momenta sačinjavanja ovog izvještaja isto nije riješeno.		●	
Sud preduzima aktivnosti da se sve evidentirane uplate u Glavnoj knjizi povežu s konkretnim predmetima te provodi aktivnosti na uspostavljanju pouzdanih evidencija potraživanja po svim aktivnim predmetima i njihovoj naplati. U dijelu naplate sudske takse, troškova krivičnog postupka, novčanih kazni i oduzimanja imovinske koristi pribavljene krivičnim djelom, Sud preduzima odgovarajuće aktivnosti u		●	

okviru svoje nadležnosti kako bi se dosuđena sredstva u korist budžeta institucija BiH naplatila.			
Sud je reducirao broj osoba angažovanih na osnovu ugovora o radu na određeno vrijeme, ali i dalje postoji određeni broj osoba koje se angažuju više od tri mjeseca uz manji prekid između dva angažmana.		●	
Sud je preduzeo odgovarajuće mjere glede zaključivanja okvirnih sporazuma kod javnih nabavki usluga održavanja biro opreme.	●		
Sud nije odobravao plaćeno odsustvo za polaganje pravosudnog i stručnog ispita zaposlenim s kojima je zaključen ugovor o radu na određeno vrijeme dok traje Projekt.	●		
Sud je preduzimao aktivnosti na rješavanju sudskih sporova zaposlenih u cilju sprečavanja daljih negativnih efekata po budžet institucija BiH. Glede realizacije sudskih izvršenja u 2018. godini, Sud kao budžetski korisnik nema evidentirane promjene u poslovnim knjigama, odnosno isplata na teret budžeta. Obaveze proistekle iz sudskih i vansudskih nagodbi se isplaćuju na teret budžeta institucija BiH i međunarodnih obaveza BiH s analitičkog konta 614817 – izvršenje sudskih presuda i rješenja o izvršenju.		●	

Napominjemo da do daljnjeg nije primjenjivo konstatovanje pitanja uknjižbe vlasništva zemljišta i objekata u kompleksu gdje su smješteni Sud i druge pravosudne institucije. Naime, Sud je imao proaktivan pristup rješavanju pitanja glede evidentiranja objekata i zemljišta koje koristi Sud i druge pravosudne institucije BiH, za koje je pravo vlasništva i korištenja utvrđeno Odlukom visokog predstavnika. Podsjećamo da se Sud obraćao Uredu visokog predstavnika u BiH u namjeri da isti razmotri mogućnost izmjene Odluke visokog predstavnika, kojom se utvrđuje pravo vlasništva u kompleksu, na način da kao titular vlasništva bude naveden Sud. S obzirom na to da nije bilo odgovora od strane Ureda visokog predstavnika u BiH, isto pitanje će biti razmatrano u budućem periodu te nije primjenjivo za ovu godinu kao što je gore navedeno.

3. SISTEM INTERNIH KONTROLA

Sud je odgovoran za kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja i usklađenost poslovanja sa zakonima i drugim propisima. Predsjednik i svi suci Suda čine Opću sjednicu koja je, prema Zakonu¹ i Poslovniku o radu², mjerodavna za izradu i usvajanje poslovnika o radu, usvajanje plana rada i prijedloga budžeta Suda. Dužnosti predsjednika Suda su organizacija rada Suda, saradnja s drugim institucijama te vršenje drugih dužnosti u skladu s važećim zakonima i poslovníkom. Za pripremu i izvršavanje budžeta Suda, također je zadužen predsjednik Suda uz pomoć generalnog sekretara.

Unutrašnja organizacija i način rada Suda utvrđeni su Pravilnikom o unutrašnjoj organizaciji Zajedničkog sekretarijata i Ureda registrara Odjela I i Odjela II Suda iz 2015. godine i sedam izmjena istog, od kojih su dvije izmjene bile u 2018. godini.³ Pravilnikom o unutrašnjoj organizaciji Suda su sistematizovana radna mjesta za 300 izvršilaca, 10 volontera i 58 sudija. Na 31.12.2018. godine bilo je 226 zaposlenih, dva volontera i 51 sudija. Poslovi iz mjerodavnosti

¹ Službena prečišćena verzija Zakona o sudu BiH Službeni glasnik BiH broj 49/09.

² Službeni glasnik BiH broj 82/05.

³ Su:10-160/15 od 15.04.2015. godine.

Suda obavljaju se u okviru organizacionih jedinica: Krivičnog odjela, Upravnog odjela, Apelacionog odjela, Ureda registrara Odsjeka I i II Krivičnog i Apelacionog odjela te Zajedničkog sekretarijata Suda. Zajedničkim sekretarijatom Suda rukovodi generalni sekretar, pod nadzorom predsjednika Suda i u skladu s uslovima utvrđenim Poslovnikom o radu Suda. Generalnom sekretaru pomažu dva pomoćnika generalnog sekretara. Registrar rukovodi Uredom registrara i nadležan je, u saradnji s predsjednikom Suda, za upravljanje i pružanje usluga podrške Odsjeku I i II Krivičnog i Odsjeku I i II Apelacionog odjela. Pravilnik o radu Suda⁴ i osam izmjena istog, od kojih je jedna u 2018. godini, reguliše radno-pravni status zaposlenika Zajedničkog sekretarijata Suda i Ureda registrara Odjela I i Odjela II Krivičnog i Apelacionog odjela Suda, način i postupak prijema u radni odnos, zaključivanje ugovora o radu i druga prava i obaveze u mjeri u kojoj ova pitanja nisu uređena zakonom i podzakonskim aktima.

Izmjene Pravilnika o unutrašnjoj organizaciji kao i izmjene Pravilnika o radu Suda se obrazlažu ukazanom potrebom prilagodbe postojećeg stanja u cilju bolje i efikasnije organizacije o kojoj raspravlja menadžment Suda i o čemu se vode zapisnici.

3.1 Finansijsko upravljanje i kontrola

Sistem finansijskog upravljanja i kontrole je u završnoj fazi implementacije u skladu sa Zakonom o finansiranju institucija BiH⁵, Priručnikom za finansijsko upravljanje i kontrolu i Smjernicama za provođenje procesa upravljanja rizicima u institucijama BiH. Sud je sačinio popis i mapiranje poslovnih procesa, utvrdio i procijenio rizike za veći dio procesa. Akcionim planom je predviđeno tokom 2019. godine okončati aktivnosti na sveukupnoj procjeni rizika, kao i izradi registra rizika. Također, Sud je popunio obrazac Godišnjeg izvještaja o finansijskom upravljanju i kontroli za 2018. godinu i dostavio Centralnoj harmonizacijskoj jedinici Ministarstva finansija i trezora BiH 13.02.2019. godine, i u istom naveo aktivnosti koje namjerava provesti u cilju uspostavljanja sistema finansijskog upravljanja i kontrole.

PREPORUKA 1

Sud je u obavezi da, u skladu s važećim propisima, okonča aktivnosti na uspostavljanju sveobuhvatnog sistema finansijskog upravljanja i kontrole.

3.2 Interna revizija

U skladu sa Zakonom o internoj reviziji institucija BiH⁶ i Odlukom o kriterijima za uspostavljanje jedinica interne revizije u institucijama BiH⁷, internu reviziju u Sudu bi trebala obavljati Jedinica interne revizije u okviru Ministarstva pravde BiH.

Sud i Tužilaštvo nisu prihvatili potpisivanje Sporazuma i Povelje s Jedinicom za internu reviziju Ministarstva pravde BiH. Sud je, zajedno s Tužilaštvom BiH, dostavio odgovor da smatra da Odluka Centralne harmonizacijske jedinice o kriterijima za uspostavljanje jedinica interne revizije u institucijama BiH na nepravilan način vrši diverzifikaciju pravosudnih institucija na državnom nivou, svrstavajući Sud i Tužilaštvo pod nadležnost Jedinice interne revizije pri

⁴ Su:10-31214 od 05.09.2014. godine.

⁵ Službeni glasnik BiH, broj 61/04, 49/09, 42/12, 87/12 i 32/13.

⁶ Službeni glasnik BiH, broj 27/08 i 32/12.

⁷ Službeni glasnik BiH, broj 49/12 i 69/17.

Ministarstvu pravde, a što je u direktnoj suprotnosti s članom 1. (struktura vlasti) i članom 6. Zakona o internoj reviziji, kao i u suprotnosti s članom 1. tačka 2. Ustava BiH.

U cilju rješavanja ovog pitanja u smislu otklanjanja zakonskih prepreka za uspostavljanje jedinice interne revizije, Sud i Tužilaštvo BiH su se 31.08.2018. godine zajedno obratili Centralnoj harmonizacijskoj jedinici pri Ministarstvu finansija i trezora BiH s prijedlogom da se nađe način za izmjenu trenutno važeće Odluke o kriterijima kojom je obavljanje interne revizije Suda protivno principima vladavine prava i diobe vlasti, povjereno Jedinici interne revizije pri Ministarstvu pravde BiH. U vrijeme obavljanja revizije, prezentovan nam je akt od 11.09.2018. godine kojim je Centralna harmonizacijska jedinica pri Ministarstvu finansija i trezora BiH prihvatila inicijativu ovih dviju institucija i predložila održavanje zajedničkog sastanka u cilju razmatranja modaliteta uspostave funkcije interne revizije za Sud. Na sastanku je dogovorena daljnja koordinacija u cilju uspješnog realizovanja predmetne inicijative. Međutim, do momenta sačinjavanja ovog Izvještaja nije došlo do pozitivnog pomaka glede uspostavljanja odgovarajućeg modaliteta interne revizije Suda, niti je Sud potpisao Sporazum i Povelju o vršenju interne revizije s Jedinicom interne revizije Ministarstva pravde BiH. Shodno navedenom, funkcija interne revizije u Sudu još nije uspostavljena.

PREPORUKA 2

Sud je u obavezi da u saradnji s nadležnim institucijama riješi pitanje uspostave funkcije interne revizije u skladu sa Zakonom o internoj reviziji institucija BiH.

4. BUDŽET

Zakonom o budžetu institucija Bosne i Hercegovine i međunarodnih obaveza Bosne i Hercegovine za 2018. godinu⁸, Sudu su odobrena sredstva u ukupnom iznosu od 17.197.000 KM. Isti je uvećan za prijenos neutrošenih sredstava iz 2017. godine po projektu IPA-2013 u iznosu od 191.309 KM, za doznačena sredstva u 2018. godini (druga tranša IPA-2013) u iznosu od 663.167 KM, kao i za priliv sredstava na osnovu prodaje automobila u iznosu od 5.088 KM. Nakon navedenih usklađivanja raspoloživi budžet Suda iznosio je 18.056.564 KM.

Ukupno izvršenje budžeta za 2018. godinu iznosilo je 16.532.736 KM, od čega se na sredstva budžeta odnosi 15.912.236 KM, a na budžet projekta IPA-2013 iznos od 600.500 KM.

Sud je izvršio usklađivanje rashoda budžeta koje je odobrilo Ministarstvo finansija i trezora 10.10.2018. godine BiH, prema kojima je izvršena izmjena strukture rashoda unutar odobrenog budžeta. Ukupan iznos prestrukturisanja je 50.000 KM (povećani izdaci za nabavku opreme za 50.000 KM, a smanjeni izdaci za rekonstrukciju i investiciono održavanje (50.000 KM)).

5. FINANSIJSKI IZVJEŠTAJI

Sud je sačinio Godišnji finansijski izvještaj za 2018. godinu i dostavio ga nadležnim organima i institucijama u skladu s važećim propisima i u utvrđenom roku.

Sud je sačinio i Izvještaj o radu za 2018. godinu i dostavio ga Visokom sudskom i tužilačkom vijeću BiH.

⁸ Službeni glasnik BiH, broj 08/18.

Analizom bilješki uz finansijske izvještaje konstatovano je da iste sadrže sveobuhvatne informacije o izvršenju budžeta Suda.

5.1 Pregled rashoda i izdataka iz budžeta

U pregledu rashoda i izdataka po ekonomskim kategorijama - zbirno, u periodu od 01.01. do 31.12.2018. godine, ukupno ostvareni rashodi iskazani su u iznosu od 16.532.736 KM, što je u odnosu na rashode u raspoloživom budžetu za 2018. godinu manje za 1.523.828 KM, ili što iznosi 92 % raspoloživog budžeta. Od toga, budžetska sredstva su realizovana u iznosu od 15.912.236 KM, a donatorska sredstva u iznosu od 620.500 KM.

Značajni rashodi iz budžeta odnose se na: bruto plaće (11.087.326 KM), naknade troškova zaposlenih (720.306 KM), izdatke telefonskih i poštanskih usluga (249.470 KM), izdatke za energiju i komunalne usluge (229.535 KM), nabavku materijala (117.659 KM), pravne usluge (2.614.357 KM), usluge prevođenja (58.095 KM), usluge vještačenja (32.379 KM), troškove svjedoka (114.044 KM), troškovi oslobađajućih presuda (127.787 KM), nabavku opreme (297.216 KM) i drugo.

Značajni rashodi iz projekta IPA-2013 odnose se na: bruto plaće i naknade plaća (445.917 KM), naknade troškova zaposlenih (30.680 KM), izdatke za pravne usluge (141.524 KM).

Pregled rashoda i izdataka iz budžeta prikazan je u Tabeli I u prilogu Izvještaja.

5.1.1 Bruto plaće

Bruto plaće i naknade iz plaća na 31.12.2018. godine iskazane su u iznosu od 11.087.326 KM, od čega neto plaće i naknade iznose 6.416.945 KM, a porezi i doprinosi 4.670.381 KM.

Budžetom za 2018. godinu planirano je 286 zaposlenih, a na 31.12.2018. godine u Sudu je bilo 276 zaposlenih (260 Sud i 16 IPA-2013).

Obračun plaća vrši se u skladu sa Zakonom o plaćama i drugim naknadama u sudskim i tužilačkim institucijama na nivou BiH (suci i stručno osoblje)⁹ i Zakonom o plaćama i naknadama u institucijama BiH (zaposleni sa srednjom stručnom spremom)¹⁰.

Postupcima revizije utvrđeno je da Sud nije podnio zahtjeve za refundiranje naknade plaće zaposlenim za vrijeme bolovanja u 2018. godini, nadležnom fondu zdravstvenog osiguranja, u skladu s važećom Instrukcijom Ministarstva finansija i trezora BiH¹¹. Na osnovu prezentovane dokumentacije, u tekućoj godini nije evidentirano potraživanje za refundiranje naknada plaće za vrijeme bolovanja, a na poziciji naknada plaće za bolovanje preko 30 ili 42 dana iskazan je iznos od 76.182 KM.

PREPORUKA 3

Sud je dužan pravovremeno podnositi zahtjeve za refundaciju isplaćene naknade plaće za vrijeme bolovanja, u skladu s Instrukcijom Ministarstva finansija i trezora BiH.

⁹ Službeni glasnik BiH broj: 90/05 i 32/07

¹⁰ Službeni glasnik BiH broj: 23/08, 35/09, 75/09, 32/12, 42/12, 50/12, 87/13, 75/15, 88/15, 16/16, 94/16 i 72/17.

¹¹ Instrukcija za obračun naknade za vrijeme privremene spriječenosti za rad (bolovanje) broj: 08/04-16-1-4856-1/13 od 10.5.2013. godine i broj: 08/04-02-2-3667-3/14 od 9.5.2014. godine.

5.1.2 Naknade troškova zaposlenih

Naknade troškova zaposlenih ostvarene s 31.12.2018. godine iznose 750.985 KM (720.306 KM Sud BiH i 30.680 KM IPA-2013), od čega su značajnije naknade za prijevoz (105.616 KM), topli obrok (166.227 KM) i regres (261.026 KM).

5.1.3 Ugovorene usluge

Pravne usluge realizovane u iznosu od 1.473.602 KM se odnose na troškove advokata koje po službenoj dužnosti postavlja Sud u slučajevima i na način određen Zakonom o krivičnom postupku BiH. Advokati po službenoj dužnosti mogu periodično ispostaviti zahtjev za isplatu troškova, s pregledom preduzetih radnji i cjenovnikom tih usluga, koji je utvrđen odlukom Vijeća ministara BiH¹². Sud donosi rješenja ili naloge kojima se troškovi iz zahtjeva u cijelosti ili djelimično priznaju. Troškovnik obuhvata sva postupanja (akti, dopisi, podnesci, pristupi ročištima i slično) s iznosima po advokatskoj tarifi. Po donošenju presude, odlučuje se da li će ti troškovi pasti na teret optuženog ili na teret budžeta Suda.

Usluge prevođenja su planirane u iznosu od 31.000 KM, dok je izvršenje s 31.12.2018. godine iznosilo 58.096 KM. Navedene usluge se isplaćuju na osnovu rješenja kojim se određuje naknada na ime izvršenih usluga usmenog simultanog i pisanog prevođenja, stalnim sudskim tumačima za određeni strani jezik. Sudski tumači ispostavljaju troškovnik kojim potražuju naknadu za izvršene usluge. Naknada se obračunava u skladu s odredbama Odluke o naknadi troškova krivičnog postupka prema Zakonu o krivičnom postupku BiH¹³ i Odluci o izmjeni odluke o naknadi troškova krivičnog postupka prema Zakonu o krivičnom postupku BiH¹⁴.

Troškovi svjedoka: Troškovi dnevnica, smještaja i prijevoza svjedoka koji svjedoče u krivičnim predmetima pred Sudom, obračunavaju se shodno Odluci Vijeća ministara BiH o naknadi troškova krivičnog postupka prema Zakonu o krivičnom postupku BiH i Odluci Suda BiH o visini naknade za ishranu i smještaj svjedoka, vještaka, tumača i stručnih osoba u vezi s krivičnim postupcima koji se vode pred Sudom BiH. Isplate se vrše na osnovu rješenja o naknadi troškova svjedoku, potpisanih od strane predsjednika Vijeća sudija.

5.1.4 Kapitalni izdaci

Zakonom o budžetu, Sudu su odobrena sredstva za kapitalne izdatke u iznosu od 394.088 KM, i to za nabavku opreme 355.088 KM i 39.000 KM za nabavku stalnih sredstva u obliku prava. Kapitalni izdaci su realizovani u iznosu od 333.271 KM, od čega su značajniji izdaci za nabavku sistema za pohranjivanje podataka na trake (38.808 KM), opreme za sudnice (117.571 KM), jednog vozila (24.300 KM) i drugo. Kapitalni izdaci su realizovani u skladu s namjenskom strukturom kapitalnih izdataka, koju je odobrilo Ministarstvo finansija i trezora BiH.

¹² Odluka Vijeća ministara BiH o naknadi troškova krivičnog postupka (Službeni glasnik BiH broj 44/05).

¹³ Službeni glasnik BiH broj 44/05.

¹⁴ Službeni glasnik BiH broj 80/12.

5.2 Pregled prihoda i primitaka

U pregledu prihoda, primitaka i finansiranja po ekonomskim kategorijama u periodu od 01.01. do 31.12.2018. godine, ukupno ostvareni prihodi i primici iskazani su u iznosu od 6.493.126 KM, što je u odnosu na prihode i primitke planirane budžetom za 2018. godinu više za 3.990.126 KM ili 259 %. Značajni prihodi odnose se na: prihode od taksi (356.919 KM), prihode od novčanih kazni (5.467.952 KM), prihode od donacija IPA 2013 (663.167 KM), prihode od prodaje stalnih sredstava (5.088 KM).

U prethodnom revizionom izvještaju je skrenuta pažnja na slabosti sistema internih kontrola u dijelu naplate prihoda od sudskih taksi, novčanih kazni, troškova krivičnog postupka i oduzimanja imovinske koristi pribavljene krivičnim djelom. Također je konstatovano da ne postoje odgovarajuće kontrole uspostavljenih pomoćnih evidencija o naplaćenim i nenaplaćenim prihodima, uvezivanja uplata u Glavnoj knjizi s konkretnim predmetom.

U vezi s navedenim, preporučeno je Sudu da preduzme aktivnosti na rješavanju pitanja efikasne naplate navedenih prihoda.

Obavljenom revizijom, konstatovali smo da je Sud preduzeo konkretne aktivnosti te je u okviru Odjela za informaciono-komunikacione tehnologije krajem 2018. godine završena aplikacija za evidenciju prihoda, kojom će se omogućiti povezivanje potraživanja na osnovu sudskih odluka s uplatom sredstava. Na taj način bi se trebala uspostaviti evidencija o svim naplaćenim i nenaplaćenim prihodima i osigurati postojanje vidljivog traga o svim preduzetim radnjama od momenta kad Sud donese odluku do same uplate na osnovu konkretnog predmeta. Ovom aplikacijom će se osigurati efikasno praćenje naplaćenih i nenaplaćenih sredstava na način da se u svakom trenutku zna stvarno stanje naplaćenih i nenaplaćenih prihoda na osnovu pravosnažnih presuda i sudskih taksi. U vrijeme obavljanja završne revizije bile su u toku aktivnosti unošenja u bazu aktivnih sudskih predmeta. Pozitivni efekti uvođenja u korištenje navedene aplikacije će biti moguće procijeniti u budućem periodu.

PREPORUKA 4

Potrebno je da Sud ubrza aktivnosti na primjeni aplikacije za evidenciju prihoda, kojom će se omogućiti povezivanje potraživanja na osnovu sudskih odluka s uplatom sredstava, u cilju efikasnog praćenja naplaćenih i nenaplaćenih prihoda na osnovu pravosnažnih presuda.

Sud je također imao proaktivan stav glede naplate potraživanja od sudskih taksi neizmirenih u zakonskom roku. Potraživanja za sudske takse se evidentiraju u CMS sistemu i uparaju sa stanjem na analitičkoj kartici Glavne knjige. Pitanje pravovremene naplate sudskih taksi u Sudu se rješava urgentno putem telefona, upućivanjem opomena za plaćanje, a u slučaju da se ne izvrši uplata u ostavljenom roku, za potraživanja od pravnih osoba, ispostavljaju se izvršna rješenja prema banci kod koje se vodi račun dužnika, te se na osnovu takvih rješenja provode aktivnosti prinudne naplate. Napominjemo da je kod naplate sudske takse od ranije prisutan problem mogućnosti prinudne naplate od fizičkih osoba. Naime, članom 15. Zakona o sudskim taksama propisano je da će Sud u postupku prinudne naplate tražiti od nadležnog organa uprave da taksu naplati prinudnim putem. Porezna uprava FBiH, na osnovu člana 43. Zakona o Poreznoj upravi FBiH, zadužena je samo za naplatu poreznih obaveza koje je utvrdila Porezna uprava FBiH. Iz tog razloga pokrenute su aktivnosti da se ponovno uputi inicijativa Visokom sudskom i tužilačkom vijeću za izmjenu Zakona o sudskim taksama te da se uputi Inicijativa za izmjenama Zakona o izvršnom postupku, odnosno da se istim propiše da akti Suda, kojima se strankama nalaže isplata sudskih taksi, imaju svojstvo izvršnog naslova.

Cijenimo da su sve inicijative u cilju stvaranja pravnog okvira, koji će omogućiti efikasnu naplatu sudskih taksi, neophodne i opravdane.

5.3 Bilans stanja

U bilansu stanja na 31.12.2018. godine iskazana su ukupna sredstva u iznosu od 1.194.421 KM. Ukupne obaveze s izvorima sredstava iskazane su u iznosu od 2.794.149 KM.

Značajne stavke bilansa stanja odnose se na neotpisanu vrijednost stalnih sredstava (1.185.664 KM), obaveze prema dobavljačima (594.764 KM), obaveze prema zaposlenima (976.491 KM), kratkoročna razgraničenja (39.414 KM) i izvore sredstava (1.185.665 KM).

Obaveze prema dobavljačima se blagovremeno izmiruju u 2019. godini prema dinamici dospijea. Obaveze prema zaposlenima se odnose na obaveze za bruto plaće i naknade plaća zaposlenih za decembar 2018. godine, koje su izmirene u januaru 2019. godine.

Sud je izvršio popis stalnih sredstava, novčanih sredstava, potraživanja i obaveza, te sitnog inventara i materijala na 31.12.2018. godine. Popisom nisu konstatovane značajnije nepravilnosti.

Bilans stanja prikazan je u Tabeli II u prilogu Izvještaja.

5.4 Pregled dinamike zapošljavanja

Prema pregledu dinamike zapošljavanja, Sud je zaključno s 31.12.2018. godine imao 260 zaposlenih, što je za 15 manje od predviđenog broja u Pravilniku o unutrašnjoj organizaciji.

U 2018. godini je projekcijom budžeta Suda planirano zapošljavanje šest sudija. Visoko sudsko i tužilačko vijeće je u 2018. godini imenovalo samo jednog dodatnog suca na određeno vrijeme (dvije godine). Iako je planirano, drugih imenovanja sudija u Sudu nije bilo u 2018. godini, a istovremeno je u izvještajnom periodu dvoje sudija razriješeno dužnosti. Tokom 2018. godine Sud je izvršio prijem pet osoba na neodređeno vrijeme i 26 na određeno vrijeme. U okviru ukupnog broja angažovanih osoba na određeno vrijeme je i šest pripravnika, dva volontera, jedan dodatni sudija i dvije osobe na projektu IPA-2013. U istom periodu radni odnos u Sudu je po raznim osnovama prestao za 41 zaposlenog. Reviziji su dostavljena obrazloženja dinamike zapošljavanja prema pozicijama, kao i detaljno obrazloženje glede prijema zaposlenih u radni odnos, razlozima, potrebama i načinu prijema. Na osnovu prezentovanih informacija, konstatovali smo da Sud raspisuje konkurse za prijem zaposlenih na neodređeno ili određeno vrijeme u skladu s obimom posla, potrebama za popunjavanjem određene pozicije, ukoliko je ista upražnjena. Odluka o potrebi popunjavanja, odnosno prijema u radni odnos, se donosi na obrazložen zahtjev registrara Suda ili glavnog sekretara Suda. Pored navedenog, za svakog angažovanog zaposlenika u personalnom dosjeu je pohranjen pisani obrazloženi prijedlog rukovodioca odjela ili suca na čijem je referatu iskazana potreba za angažovanjem.

U skladu s članom 9. stav (1) tačka c) propisana je mogućnost zaključenja ugovora o radu na određeno vrijeme do tri mjeseca bez raspisivanja javnog konkursa, kada zbog hitnosti obavljanja posla, iznenadnog povećanja obima posla i iznenadnog odsustva zaposlenika nije moguće pravovremeno raspisati javni konkurs.

Sud se prilikom zapošljavanja na određeno vrijeme bez raspisivanja javnog konkursa pozivao na navedenu odredbu, tumačeći je na način da angažman do tri mjeseca može biti korišten više puta za isto mjesto i istu osobu uz manje prekide, i da nije ograničen na samo jedan period od tri mjeseca. Revizija ne dijeli isti stav po pitanju tumačenja navedene odredbe zakona, što se može vidjeti iz izvještaja o obavljenim finansijskim revizijama u institucijama BiH iz

prethodnog perioda. Sud je ipak, i pored navedenog stava, postupajući po preporuci revizije iz Izvještaja za 2017. godinu, u cilju reduciranja broja angažmana zaposlenika na osnovu produžavanja ugovora o radu po tri mjeseca više puta u toku godine na jednom radnom mjestu s manjim prekidima, započeo intenzivnije raspisivati javne konkurse za prijem u radni odnos na određeno vrijeme od šest mjeseci do godinu dana. Ukoliko se nakon isteka ovog perioda pokaže potreba za kontinuiranim popunjavanjem pozicije raspisuje se konkurs za ugovor na neodređeno vrijeme.

PREPORUKA 5

Zbog uloge i značaja u okviru pravosudnog sistema u BiH, postupanje Suda je pod posebnom pažnjom javnosti, te u skladu s tim smatramo da procesu zapošljavanja, kao izrazito osjetljivom procesu, treba nastaviti pristupati na način koji omogućava visok stepen transparentnosti. Na navedeni način bi bilo poželjno postupati, čak i u slučajevima kada moguće nedovoljno precizne zakonske odredbe omogućavaju „slobodnije“ tumačenje istih, ukoliko bi njihova primjena imala kao posljedicu smanjenu transparentnost.

6. JAVNE NABAVKE

Sud BiH je donio Plan javnih nabavki za 2018. godinu, koji je tokom godine imao određene izmjene i dopune u skladu s potrebama institucije. Plan javnih nabavki i njegove izmjene objavljene su na internet stranici Suda. U Sudu je imenovana jedna komisija za javne nabavke, koja je provodila sve postupke tokom godine.

Prema prezentovanim podacima, Sud je u 2018. godini proveo 35 postupaka javnih nabavki iz tekućih izdataka (tri otvorena, 16 konkurentskih i 16 putem direktnih postupaka), te sedam otvorenih, sedam konkurentskih postupaka i pet direktnih postupaka iz kapitalnih izdataka. Nakon prethodno provedenih postupaka, ukupna vrijednost zaključenih ugovora iznosila je 647.680 KM (314.409 KM iz tekućih izdataka i 333.271 KM iz kapitalnih izdataka).

Revizijom praćenja realizovanja zaključenih ugovora su ustanovljena prekoračenja ugovorenih količina (kompjuterski materijal, uredski materijal i za nabavku obrazaca za štampanje), s tim da nisu prekoračene ugovorene vrijednosti.

Na osnovu provedenih intervjua i dokaznih postupaka, kroz aktivnosti u procesu javnih nabavki, možemo konstatovati da postoje slabosti u procesu javnih nabavki u dijelu planiranja i provođenja više vrsta postupaka javnih nabavki za istu vrstu roba i usluga.

Tako je, naprimjer, Sud izvršio nabavku usluge održavanja softvera putem otvorenog postupka. Procijenjena vrijednost nabavke je bila 46.250 KM bez PDV-a. Uvidom u Plan nabavki za 2018. i realizovanje procedura javnih nabavki u Sudu uočeno je da su pored navedenog otvorenog postupka planirani i provedeni i drugi postupci (putem direktnog sporazuma) za nabavku usluge održavanja licenci, što ukazuje na provođenje postupaka ispod vrijednosnih razreda propisanih Zakonom. Također je na osnovu uvida u tabele o provedenim postupcima konstatovano da su provedeni različiti postupci za nabavku kompjuterske opreme i opreme za prijenos podataka i glasa, gdje smatramo da je bilo moguće da se navedene nabavke objedine u jednu.

PREPORUKA 6

Uvažavajući specifičnosti pojedinih nabavki Suda, neophodno je uspostaviti odgovarajuće interne kontrole s ciljem provođenja odgovarajućih postupaka javnih nabavki za nabavku roba i usluga iste vrste.

7. OSTALO

7.1 Sudski sporovi

U pogledu realizacije sudskih izvršenja u 2018. godini, Sud kao budžetski korisnik nema evidentirane promjene u poslovnim knjigama, odnosno isplata na teret budžeta Suda. S obzirom na to da odluke Ustavnog suda BiH¹⁵ još uvijek nisu izvršene, došlo je do ulaganje tužbi, od zaposlenih koji ne ostvaruju pravo na navedene naknade, što ima za posljedicu sudske sporove i isplatu dodatnih sredstava na teret budžeta institucija BiH.

Ministarstvo finansija i trezora BiH i Pravobranilaštvo BiH uputili su zajednički prijedlog o načinu postupanja na realizaciji zaključaka Vijeća ministara BiH sa 131. sjednice koja je održana 30.01.2018. godine, te je u cilju izbjegavanja dodatnih troškova na teret budžeta institucija BiH po temelju tužbi podnesenih od sudija, tužilaca i određenih kategorija stručnog osoblja zaposlenog u pravosudnim institucijama na nivou BiH, a radi isplate naknade troškova prijevoza, ishrane tokom rada, naknade za odvojeni život i troškova smještaja, predloženo zaključivanje sudskih i vansudskih nagodbi. Obaveze proistekle iz sudskih i vansudskih nagodbi se isplaćuju na teret budžeta institucija BiH i međunarodnih obaveza BiH s analitičkog konta 614817 – izvršenje sudskih presuda i rješenja o izvršenju. Obračun navedenih naknada za suce i stručno osoblje koje se odlučilo na zaključivanje vansudskih nagodbi vrši Odjel za materijalno-finansijske poslove Suda BiH, te se vode evidencije o svim obračunatim naknadama za zaposlenike Suda.

¹⁵ U-7/12 i U-29/13 po pitanju naknada za prijevoz, topli obrok, odvojeni život, smještaj i ostalih naknada koje nisu definisane Zakonom o plaćama i naknada u sudskim i tužilačkim institucijama na nivou

8. KOMENTARI

Sud je u ostavljenom roku dostavio komentare na Nacrt izvještaja o obavljenoj reviziji. U komentarima se Sud osvrnuo i detaljno komentarisao samo tačku 5.4. Dinamika zapošljavanja. Uz komentare, Sud nije dostavio dodatne dokaze. Sud je u komentarima iznio određene stavove s kojima smo uglavnom bili upoznati i tokom procesa revizije. Značajnu pažnju u komentarima Sud je posvetio konstataciji vezanoj za zapošljavanje na neodređeno vrijeme u 2018. godini. Razmatrajući dostavljene komentare Suda, a rukovodeći se činjenicom da navedeni nalaz nije uticao na revizorsko mišljenje, te da smo ocijenili da za Ured za reviziju spomenuta konstatacija nije od značaja (promatrajući nalaz i preporuku kao cjelinu) u odnosu na značaj koji ista prema sadržaju komentara ima za Sud, odlučili smo da spomenutu konstataciju izostavimo u konačnom izvještaju. Navedena promjena, uz manje korekcije u preporuci datoj vezano za zapošljavanje su i jedine promjene u odnosu na Nacrt izvještaja. U cilju davanja određenih dodatnih pojašnjenja o revizionom procesu, kao i pojašnjenja naših stavova po određenim segmentima dostavljenih komentara, uz konačan Izvještaj Sudu smo dostavili i Odgovor na dostavljene komentare.

Vođa tima za finansijsku reviziju

Nada Laco, viši revizor, v.r.

Rukovodilac Odjela za finansijsku reviziju

Nedžad Hajtić, viši revizor, v.r.

Članovi tima za finansijsku reviziju

Nevena Bugarin, revizor, v.r.

Azra Husić, revizor, v.r.

Nevena Kenjić, revizor, v.r.

Nerman Velić, IT revizor, v.r.

Sadmir Teskeredžić, revizor za
pravne poslove, v.r.

Rukovodilac Odjela za razvoj, metodologiju i kontrolu kvaliteta finansijske revizije

Dragoljub Kovinčić, viši revizor, v.r.

Prilozi

Tabela I – Pregled rashoda budžeta za 2018. godinu

Tabela II – Bilans stanja na 31.12.2018. godine

Izjava o odgovornostima rukovodstva

Pregled rashoda budžeta za 2018. godinu

Sud BiH

Tabela I

Opis	Odobreni budžet	Usklađivanja budžeta	Ukupni budžet (2+3)	Izvršenje budžeta	Procent 5/4*100
1	2	3	4	5	6
1. Tekući izdaci	16,808,000	0	16,808,000	15,578,965	93
Bruto plaće i naknade	11,804,000		11,804,000	11,087,326	94
Naknade troškova zaposlenih	780,000		780,000	720,306	92
Putni troškovi	31,000		31,000	23,539	76
Izdaci telefonskih i pošt. usluga	252,000		252,000	249,470	99
Izdaci za energiju i kom. usluge	310,000		310,000	229,535	74
Nabavka materijala	138,000		138,000	117,659	85
Izdaci za usl. prijevoza i goriva	12,000		12,000	4,492	37
Unajmljivanje imovine i opreme	0		0	0	
Izdaci za tekuće održavanje	159,000		159,000	119,625	75
Izdaci za osiguranje	6,000		6,000	2,564	43
Ugovorene i druge posebne usluge	3,316,000		3,316,000	3,024,449	91
2. Kapitalni izdaci	389,000	5,088	394,088	333,271	85
Nabavka zemljišta			0		
Nabavka građevina			0		
Nabavka opreme	300,000	55,088	355,088	297,216	84
Nabavka ostalih stalnih sredstava	39,000		39,000	36,055	92
Rekonstrukcija i invest. održavanje	50,000	-50,000	0		
3. Tekući grantovi	0	0	0	0	
			0		
			0		
4. Višegodišnja kapitalna ulaganja	0	0	0	0	
			0		
5. Novčane donacije	663,167	191,309	854,476	620,500	73
			0		
6. Programi posebne namjene	0	0	0	0	
			0		
7. Ukupno (1+2+3+4+5+6)	18,056,564	196,397	18,056,564	16,532,736	92

Rukovodstvo je Pregled rashoda budžeta po ekonomskim kategorijama odobrilo _____ 2019. godine.

Predsjednik Suda BiH:
Ranko Debevec

Bilans stanja na 31.12.2018. godine

Sud BiH

Tabela II

Opis	31.12.2018	31.12.2017	Procent 2/3*100
1	2	3	4
1. Gotovina, krat. potraživanja, razgraničenja i zalihe	8,755	23,001	38
Novčana sredstva	8,755	10,915	80
Kratkoročna potraživanja		12,086	0
Kratkoročni plasmani			
Interni finansijski odnosi			
Zalihe			
Kratkoročna razgraničenja			
2. Stalna sredstva	1,185,665	1,237,547	96
Stalna sredstva	5,388,793	5,099,337	106
Ispravka vrijednosti	4,203,128	3,861,790	109
Neotpisana vrijednost stalnih sredstava	1,185,665	1,237,547	96
Dugoročni plasmani			
Dugoročna razgraničenja			
UKUPNO AKTIVA (1+2)	1,194,420	1,260,548	95

3. Kratkoročne obaveze i razgraničenja	1,610,669	1,643,472	98
Kratkoročne tekuće obaveze	594,764	617,374	96
Kratkoročni krediti i zajmovi			
Obaveze prema zaposlenima	976,491	1,006,745	97
Interni finansijski odnosi			
Kratkoročna razgraničenja	39,414	19,353	204
4. Dugoročne obaveze i razgraničenja	0	0	
Dugoročni krediti i zajmovi			
Ostale dugoročne obaveze			
Dugoročna razgraničenja			
5. Izvori sredstava	1,185,665	1,237,547	96
Izvori sredstava	1,185,665	1,237,547	96
Ostali izvori sredstava			
Neraspoređeni višak prihoda/rashoda			
UKUPNO PASIVA (3+4+5)	2,796,334	2,881,019	97

Napomena: Pravilnikom o finansijskom izvještavanju institucija Bosne i Hercegovine, čl.10. stav 4., napomenuto je da bilans stanja budžetskih korisnika **neće biti uravnotežen** (aktiva jednaka pasivi) zbog programski uspostavljenog sistema Glavne knjige, dok će bilans stanja koji radi Ministarstvo finansija i trezora na nivou budžeta institucija Bosne i Hercegovine za tekuću godinu biti uravnotežen.

Rukovodstvo je Bilans stanja odobrilo _____ 2019. godine.

Predsjednik Suda BiH:
Ranko Debevec

Izjava o odgovornostima rukovodstva

Međunarodni standard vrhovnih revizionih institucija (ISSAI 1580) predviđa da revizor treba dobiti odgovarajuću izjavu od rukovodstva institucije kao dokaz da rukovodstvo priznaje svoju odgovornost za objektivno prikazivanje finansijskih izvještaja saglasno mjerodavnom okviru finansijskog izvještavanja, te da je odobrilo finansijske izvještaje.

Rukovodstvo **Suda Bosne i Hercegovine** (u daljem tekstu: Sud) dužno je osigurati da finansijski izvještaji za 2018. godinu budu izrađeni u skladu sa Zakonom o finansiranju institucija BiH (Službeni glasnik BiH broj 61/04, 49/09, 42/12, 87/12 i 32/13), Pravilnikom o finansijskom izvještavanju institucija BiH (Službeni glasnik BiH broj 25/15 i 91/17) i Pravilnikom o računovodstvu s računovodstvenim politikama i procedurama za korisnike budžeta institucija BiH (protokol Ministarstva finansija i trezora BiH broj 01-08-02-1-1515-1/15 od 04.02.2015. godine). Rukovodstvo je također obavezno postupati u skladu sa Zakonom o budžetu institucija BiH i međunarodnih obaveza BiH za 2018. godinu (Službeni glasnik BiH broj 8/18) i pratećim uputstvima, pojašnjenjima i smjernicama koje donosi Ministarstvo finansija i trezora BiH, kao i ostalim zakonima u Bosni i Hercegovini, tako da finansijski izvještaji daju fer i istinit prikaz finansijskog stanja Vijeća.

Pri sastavljanju takvih finansijskih izvještaja odgovornosti rukovodstva obuhvaćaju garancije:

- da je osmišljen i da se primjenjuje i održava sistem internih kontrola koji je relevantan za pripremu i fer prezentaciju finansijskih izvještaja i usklađenost sa zakonima i drugim propisima;
- da finansijski izvještaji ne sadrže materijalno značajne pogrešne iskaze;
- da finansijski izvještaji sadrže sve relevantne podatke i analize izvršenja budžeta, kao i podatke o sistemu internih kontrola i realizaciji preporuka revizije;
- da se u poslovanju primjenjuju važeći zakonski i drugi relevantni propisi.

Rukovodstvo je također odgovorno za čuvanje imovine i resursa od gubitaka, pa stoga i za preduzimanje odgovarajućih mjera kako bi se spriječile i otkrile pronevjere i ostale nezakonitosti.

Datum, _____

Predsjednik Suda BiH:

Ranko Debevec